

文件第一 奏牘

前都察院新疆道監察御史江春霖奏

摺 補錄

奏爲物議沸騰。難安緘默。披瀝上陳。仰祈 聖鑒事。竊維孝友是施。聖經之明訓。親賢並用。盛世之良規。故傲象不仁。虞帝猶封以有庠。叔鮮未叛。周公尚使之監殷。謂手足之親。必不可寄腹心之重。此後世猜忌之私。非所語於聖治也。自 皇上御極。監國攝政王蒞政以來。崇陵之工。海軍之事。以郡王銜貝勒載洵治之。禁衛之兵。軍諮之府。以郡王銜貝勒載濤掌之。本根庇遠。磐石宗強。與古同符。於今爲烈。然而鄭寵共叔。失教旋譏。漢驕厲王。不容終病。載在史策。爲萬世戒。二王性成英敏。休戚相關。料未至循覆車之轍。而慎終於始。不可不爲杜漸防微也。比者道路傳聞。臣寮議論。涉及二王者頗多。而 監國攝政王之令聞。亦爲稍減。禮義果使不愆。人言固無足恤。但恐位尊

文件第一 奏牘

權重。左右近習。或有假借名色之人。則致謗出於有因。卽失察亦所不免。上負委任。下玷聲名。非細故也。伏念 德宗景皇帝同氣之親。 監國攝政王及二王而已。 景皇帝以神器付之。 皇上沖齡踐阼。軍國重事。 監國攝政王主之。二王輔之。治同其樂。亂同其憂。國事卽家事也。國之不保。家於何寄。臣且勿論其他。但論戊申十月以前。士大夫奔走於誰之門。苞苴入於誰之家。顧及二王者乎。今之夤緣干進者。不過以事權所在。欲求富貴。不得不思變計耳。萬一事權不屬。其效奔走而貢苞苴者。更不知於誰之門誰之家也。試令以臣此言。思之竟日。當有恍然於蠅營狗苟之徒之不足倚任者。而可見近利而忘遠害耶。此理至明。固無待臣言之贅也。臣家世讀書。未登仕版。五品一官。志願已足。祇以三甲末進士。荷 景皇帝拔置詞林。得備諫職。破格殊恩。涓埃未報。鬚髮頽白。覲顏就列。幸際重光日月。方冀補闕拾遺。一清宿弊。異日奉身而退。得爲太平老百姓。扶杖以觀德化之成。不意歲未及周。物議

四十九

庚戌

文件第一 奏牘

沸騰。竟有出於愚計之外者。臣不禁為 祖 宗三百年天下。效賈生痛哭流涕。長太息也。風聞之語。雖不足憑。無病之呻。殊難自己。陛下諒臣愚忠。敢乞勿露臣章。召誠二王。有則改之。無則加勉。庶息衆謗。顧全大局。儻謂語涉離間。卽懇宣示中外。放歸田里。俾海內知臣言而不聽。並於知而不言。勿使如高若訥一流。為天下後世所議。披瀝上陳。詞多懇直。伏乞 皇上聖鑒。臣不勝激切屏營之至。

山東巡撫孫寶琦奏詳解幣制三疑二誤並酌擬單數本位及平色法價等

差摺併單

奏為詳解幣制疑問。並酌擬單數本位。及平色法價等差。繕單條陳。恭摺仰祈 聖鑒事。竊維釐定幣制。關係全國財政。比年中外臣工。研究幣制。畫一之策。本位用銀。僉同無異。而平色法價。猶待詳細審定。以歸至當。臣嘗求其遲迴審慎之故。以為事實上之疑問有三。而根本上之疑問有二。非先洞澈此五端。則顧慮多而實行難。延宕既久。積

五十

四月

弊更深。補救愈晚。不揣冒昧。輒就管見所及。分別解釋。敬為我 皇上陳之。一議抵制外幣而生疑問也。有謂龍元與墨幣相等。故可依傍而行。若與歧異。轉使墨幣暢銷。故宜鑄同等之幣以抵之。有謂不能抵制外幣。正由平色相若。中國向以兩錢分釐計數。仍應不廢兩數。而特變重量加足成以勝之。臣查各國幣制。除有專約聯盟之外。並不從同。現在浸灌各省之外幣。非僅墨幣一種。平色價值各殊。抵不勝抵。但求依傍而行。恐操縱之權。仍不在我。十成足色之幣。各國所未見。日本銀幣。僅淨銀八成。不聞以此而敗於外幣。竊思抵制有二說。將為抵制價值。各國國際交兌。有一定比例。不以市價高下而受虧折。且銀幣恆隨金幣為漲落。皆論金幣之純分。不論銀幣之平色。中國不用金本位。終無價值相抵之一日。故整理幣制。雖暫主用銀。而必預為用金之地。此非歲月之間所能幾及者也。將為抵制輸入。各國法令。非本國銀幣。公私不得通行。凡銀行存儲外國金幣。計淨金分兩而不計枚。並須於分